

## Cartë nabëquë'ë San Pablo parë ra mënë Filipenses

**Nanú Pablo lachigui'bë; bëquë'ëi'  
cartë lu ra mënë shtë Filipos**

**1** Pablo nu Timoteo, na na'a siervë shtë Cristo Jesús. Quëquë'ë na'a cartë rë' nu quëgshe'ldë na'a saludë lu të naquereldë guë'dchi Filipos, lu ra nabëzunë Dios almë shtë rai'. Quëquë'ë na'a cartë rë' lu të naná cabësë shtë shmënë Dios nu lu të naná runë compa'ni lë'ë rai'.<sup>2</sup> Gulë bë'në recibir favurë shtë Dios nu gulë cuedchí ldu'u të por Dios Shtáda'a, nu por Jesucristo Shláma'a.

**Guna'bë Pablo lu Dios por ra  
mënë narialdí ldu'i diza'quë**

<sup>3</sup>Cadë vësë narna'ba lu Dios el quë quëhuna adorar, rdë'a graci lu më por lë'ë të. Rquitë ldua'a iurë rëagná ldua'a na të shmënë më.<sup>4</sup> Siemprë ruadi'dzënúa Dios con lëgrë la'ni ldua'a; rna'ba lu më por bien shtë të. <sup>5</sup>Rnia'a dushquilli Dios purquë juntë quëgdë'na'a dchi'ni shtë më. Quëhunë të compa'ni na të parë ruadi'dza diza'quë lu mënë dizdë primërë dzë nabini të diza'quë hashtë iurne'. <sup>6</sup>Iurne'

nahia segurë de quë Dios, el quë naguzublú obrë shtë më la'ni ldu'u të, gunë më cumplirin. Tsagla'guë runë më obrë za'quë la'ni ldu'u të hashtë iurë Jesucristo guëabrí stubi. <sup>7</sup>Naza'quë rialdí ldua'a zni de lë'ë të purquë nalé rac shtua'a lë'ë të nu juntë bédé'na'a dchi'ni shtë Dios. Bë'në të compa'ni na iurë nanúa lachigui'bë nu iurë biadi'dza shti'dzë më nu iurë bëluá'ahia lu ra mënë diza'quë na verdá. Juntë bédé'na'a recibir bendición nabëne'e më. <sup>8</sup>Dios nané de quë ruadi'dza verdá; nalé rac shtua'a lë'ë të igual cumë Cirsto Jesús rac shtu'u më lë'ë të. Rac shtua'a guënahia lu të stubi vësë más. <sup>9</sup>Nu rna'ba lu më gac shtu'u të sa' të más cadë dzë. Nu rna'ba lu më tsasé të voluntá shtë më nu gapë të mizmé llgabë con lë'ë më. <sup>10</sup>Zni gac bë'a të guadë naná más naza'quë gunë të nu gapë të tubi vidë limpi sin duldë nu adë chu bë nápëdi'i parë guënf'ill guëc të iurne', nilë iurë guëabrí Dadë Jesús de gube'e. <sup>11</sup>Zni gunë Jesucristo compa'ni lë'ë të, të parë guëquërelde të tubldí delantë lu më. Iurë guëná mënë mudë naquërelde të, gunë rall

alabar Dios; guëni'i rall llëru'bë na pudërë shtë më.

**Guëquërela sulë por Jesucristo**

<sup>12</sup>Bëchi, rac shtua'a de quë gac bë'a të grë ra cusë nagudëdë con na, tubi bien nahin purquë másru'u bërë'tsë diza'quë shtë Dios. <sup>13</sup>Bërë'tsë shti'dzë më entrë grë ra sultadë hashtë lu los de más më gobiernë. Rac bë'a rall de quë nanúa prësi purquë nahia shmënë Jesús. <sup>14</sup>Más de ni, zihani ra shmënë Jesús iurë guná rall resultadë de quë nanúa prësi, rialdí ldu'u rall shti'dzë më más, nu quëadi'dzënú rall sa' rall shti'dzë Dios. Adë rdzëbëdi'i rall.

<sup>15</sup>Verdá na bëldá mënë ruadi'dzë rall diza'quë shtë Jesucristo purquë napë rall galëmbidi shchi'nia, tantë mënë na rai' shmënë Jesús purquë biadi'dzënúa lë'ë rai'. Rzebi ldu'u rall na. Sëbëldá mënë ruadi'dzë rall shti'dzë më purquë na rall de acuerdë con lo quë naquëhuna.

<sup>16-17</sup>Ra mënë ni rac shtu'u rall na. Nané rall nanúa prësi parë guna defender diza'quë delantë mënë. Perë ra nanapë mbidi quëhunë rall predicar sulë purquë rëuu' ldu'u rall hunurë shtë sa' rall. Adë ruadi'dzëdi'i rall tubldí. Rac shtu'u rall sac zihia más ndë'ë lachigui'bë. <sup>18</sup>¿Pë rní'ihia de ndë'ë? Parë na, si talë ruadi'dzë rall diza'quë con bien llgabë u si talë ruadi'dzë rall diza'quë por mbidi, rquitë ldua'a. Nalé rquitë ldua'a iurë rac bé'ahia ruadi'dzë mënë shti'dzë Cristo.

<sup>19</sup>Perë másru'u rquitë ldua'a purquë con ayudë shtë Espíritu Santo nabëshe'ldë Jesucristo, nu

con oraciuni shtë të gapa libertá; guërua'a lachigui'bë. <sup>20</sup>Nalé rac shtua'a nu quëbeza de quë nunquë guna tubi cusë mal, no sea guëtú lua lu më. Guëdubi tiempë rac shtua'a gapa valurë të guadi'dza sin quë guëdzëbëdia'a. Iurní si talë guëbania u si talë gatia, guëná mënë pudërë shtë Cristo la'ni vidë shtëna nu gunë mënë honrar lë'ë më. <sup>21</sup>Cagnia'a ndë'ë purquë si talë guëbania, sulë rac shtua'a guna honrar Cristo, nu iurë gatia, mejurë parë na purquë guëquërelndúa lë'ë më. <sup>22</sup>Si talë guëne'e më más vidë parë na, tsagla'guë guëluá'ahia diza'quë lu ra mënë. Perë iurne' adë rac bé'adia'a guadë na guëna'zia; zuhia entrë chupë nezë; guëbania u gatia. <sup>23</sup>Naganë parë na pë guëna'zia; por tubi ladë rac shtua'a gatia parë guëquërela con Cristo; ni más mejurë parë na. <sup>24</sup>Perë stubi ladë más rqui'ni tsagla'guë guëbania parë bien shtë të. <sup>25</sup>Napa segurë de quë na voluntá shtë më guëquërela lu guë'dchiliu stu'pë tiempë parë guna compa'ni lë'ë të, të tsaldí ldu'u të shti'dzë Dios más nu parë guëquitë ldu'u të. <sup>26</sup>Iurë guëabré guëná të lua stubi, guëdë'ë të graci lu Jesucristo por tantë lëgrë nanapë të por enseñansë naze'dë guënia'a lu të.

<sup>27</sup>Rqui'ni guëbani të ziquë mënë shtë Cristo, de acuerdë con diza'quë shtë më. Gulë bë'në cumplirin si talë guëná të lua stubi u adë guënádi'i të lua. Rac shtua'a guëdchini nutici de quë tsagla'guë të firmë shnezë Dios, nu de quë unidë na të con tubsë llgabë la'ni ldu'u të mientras ruadi'dzë të

diza'quë lu ra mënë. <sup>28</sup>Si talë adë rdzébëdi'i të lu ra narunë cuntrë lë'ë të, gac bë'a rall de quë tsa rall lu cashtigu shtë Dios, nu mizmə tiempë gac bë'a rall de quë nasalvar të. Dios na el quë nagunë ra cusë rë'. <sup>29</sup>Adë rdzébëdi'i të purquë bë'në më tubi favurë naná gualdí ldu'u të shti'dzë më; nasalvar të. Nu stubi favurë bë'në më naná sac zi të por lë'ë më. <sup>30</sup>Quëhunë mënë cuntrë lë'ë të igual manërë ziquë bë'në rall cuntrë na iurë guquërdënúa lë'ë të. Hia guná të lla bë'në mënë, nu rini të iurne' quëhunë rall cuntrë na stubi guë'dchi.

**Jesucristo bidë ziquë mënë humildë**

**2** Rquitë ldu'u të purquë unidë na të con Cristo. Quëhunë më compa'ni lë'ë të, të adë riádi'i ldu'u të. Rac shtu'u më lë'ë të. Quëbezënë Espíritu Santo lë'ë të. Rac shtu'u të sa' tē nu rga'a ldu'u të lë'ë rall. <sup>2</sup>Por ni gulë bësëquitë ldu'u të na más. Gulë gapë tubsë llgabë. Gulë gac shtu'u sa'l de verdá. Gulë gac unidë. Gulë gac të de acuerdë. <sup>3</sup>Adë runë narú'bëdi'il lu sa'l. Adë runë nadchínidi'il lu sa'l. Mejurë gulë gac humildë nu gulë bë'në tratë sa'l manërë mejurë quë rúnël tratë mizmə lë'ël. <sup>4</sup>Adë rguílidi'il ra cusë naná bien parë mizmə lë'ël sino gulë gudili lo quë naná bien parë sa'l.

<sup>5</sup>Gulë gapë mizmə llgabë nagupë Cristo Jesús; gulë bë'në ziquë bë'në më. <sup>6</sup>Aunque Jesucristo na Dios, adë bészëbidi'i ldú'i' lugar shtë Dios Padre <sup>7</sup>sino bészëa'në Jesús lugar shtë hunurë nu bédchíni' lu

guë'dchiliu të gúni' sirvë ziquë tubi muzë. Gúli' cumë tubi nguii. <sup>8</sup>Iurë bédchini më con cuerpë shtë nguii, todavía más humildë gúqui'. Gúqui' obedientë; gac shtú'ui' gúni' cumplir voluntá shtë Shtádi'. Bëzu'bë diágui' hashtë gúti' lu cruz. <sup>9</sup>Por ni Dios bédë'ë más hunurë parë shíni'; napë më más hunurë quë grë cusë lu guë'dchiliu nu gube'e. Bédë'ë më tubi lë parë shíni' naná más ru'bë entrë grë nombre shtë mieti. <sup>10</sup>Bë'në Dios zni të grë ra nanabani, lo quë nananú gube'e nu lo quë nananú guë'dchiliu nu lo quë nananú lugar shtë ra tēgulë, grë rall guëzullibi rall lu Jesucristo. <sup>11</sup>Rac shtu'u Dios grë mënë guëni'i Jesucristo na Dadë narnibë'a të parë Dios Padre gúni' recibir labansë nu hunurë shtë grë mënë.

**Ra narialdí ldu'i Jesús  
na ra'i' ziquë llni**

<sup>12</sup>Bëchi narac shtua'a, gulë bëzu'bë diaguë shti'dza ziquë quëhunë të siemprë. Bëzu'bë diaguë të shti'dza iurë naguquërdënúa lë'ë të; iurne' rqui'ni más gac të obedientë mientras quërela zitu parë lë'ë të. Bë'në Dios salvar lë'ë të, të gunë të cusë za'quë. Gulë gac mënë narunë cumplir purquë zni na voluntá shtë më. Nadzë'bë si talë adë gúnëdi'i të cumplir. <sup>13</sup>Rac runë të voluntá shtë Dios purquë Dios na el quë naquëgne'e deseo za'quë parë gunë të cumplir, nu también quëgne'e më fuersë parë gunë të cumplir voluntá shtë më.

<sup>14</sup>Gulë bë'në shchi'ni më sin guëni'idi'il cuntrë sa'l; adë rdildi dí'dzëdi'i të <sup>15</sup>të parë adë chu

guëní'idi'i quëhúnël cusë mal u nádi'il verdá. Na të shmënë Dios; iurní napë quë guëquërelde të bien entrë ra mënë narianaldë tëchi deseó mal nu ráquëdi'i gunë rall cusë za'quë. Lë'ë të na të ziquë mbelëgui'i narabtsë'ë catë namás nacahi. Zni na të entrë lë'ë rall mientras ruadi'dzë të diza'quë lu ra mënë. <sup>16</sup>Diza'quë ni rne'e vidë cubi. Si talë gunë të ndë'ë, guëquitë ldua'a iurë guëabrí Jesucristo de gube'e purquë guëlua'a de quë adë bé'nëdia'a dchi'ni de baldë entrë lë'ë të. <sup>17</sup>Si talë gatia purquë biadi'dza diza'quë lu të, nahin cumë ziquë lë'ë të bënë të ofrecer mizme lë'ë të ziquë ofrendë parë lë'ë më nu guëllë'ë rënë shtëna guëc ofrendë shtë të. Pues si talë zni gac, guëquitë ldua'a nu tsu lëgrë ldua'a juntë con lë'ë të por grë bendición shtë Dios. <sup>18</sup>Mizme manërë runë tucarë guëquitë ldu'u të con na.

### Timoteo nu Epafrodito

<sup>19</sup>Si talë Dadë Jesús guëne'e permisi, rac shtua'a guëshe'lda Timoteo lueguë parë gue'dë guënall lë'ë të. Iurní iurë guëdchini nutici de lë'ë të, guëquitë ldua'a. <sup>20</sup>Adë nápëdia'a ni chu stubi ndë'ë ziquë Timoteo parë guëshe'lda lu të purquë sulë Timoteo napë zihani amor parë lë'ë të nu rac shtú'ull tsagla'guë të bien. <sup>21</sup>Pues los de más rguili rall por bien shtë rall; adë rúnëdi'i rall importë dchi'ni shtë Jesucristo. <sup>22</sup>Hía nané të lasac Timoteo parë lu dchi'ni. Lë'ëll bé'nëll sirvë lu Jesucristo con na igual ziquë tubi liguë'në quëhúnëll dchi'ni lu shtadë liguë'në. <sup>23</sup>Rac

shtua'a guëshe'lda lë'ëll despuësë gac bé'ahia lla guëru'u shcuenda. <sup>24</sup>Nu rialdí ldua'a gunë Dios tubi favurë të gueldë guënahia lë'ë të lueguë.

<sup>25</sup>Perë mientras quëbeza, rqui'ni guëshe'lda Epafrodito, bécha'a, të gueldë guënáhi' lë'ë të. Epafrodito bé'nëll compa'ni na lu dchi'ni nu bënë mënë cuntrë lë'ë na'a. Primërë bëshe'ldë të lë'ëll parë ze'dë guënall na. Bé'ni' compa'ni na lu nicidá nanapa. <sup>26</sup>Nalé rac shtu'u Epafrodito guëabrí guënall lë'ë të; rac ldú'ull purquë bini të de quë guc llú'ull. <sup>27</sup>Verdá guc llú'ull; mërë niátill perë Dios bëga'a ldu'u më lë'ëll; bëaquëll; nu bëga'a ldu'u më na të adë gápëdia'a más galërzac zi. <sup>28</sup>Por ni nalé rac shtua'a guëshe'lda Epafrodito lu të parë guëquitë ldu'u të iurë guená të lúhi' stubi. Iurní guëquitë ldua'a también. <sup>29</sup>Gulë bënë recibir lë'ëll con lëgrë la'ni ldu'u të nu gulë bënë honrar grë ra naná ziquë Epafrodito. <sup>30</sup>Hía niati Epafrodito lu dchi'ni shtë Jesucristo. Bëdchí'bi' vidë shtëhi' lu peligrë iurë bé'ni' dchi'ni shtë më, dchi'ni nadë gúquëdi'i nihunë të con na.

### Tsagla'ga delantë

**3** Iurne' bëchi, gulë bëquitë ldu'u të purquë unidë na të con Dadë Jesús. Adë riasháquëdi'i ldua'a guëquëa'a lu të mizme enseñansë nabëluá'ahia antsë, të adë guësiguëdi'i mënë lë'ë të. <sup>2</sup>Gulë gupë cuidadë ra mënë mal nanadë guënëdi'i Dios, ra naziagla'guë runë parë gac cumplir custumbrë shtë rall. Rni'i rall rqui'ni riuguë partë cuerpë ziquë quëhunë ra

mënë israelitë parë gac mënë limpi delantë lu Dios. <sup>3</sup>Lë'ë hia'a na hia'a limpi delantë lu Dios, lédëd'i'i lë'ë rall. Clarë rlua'a na hia'a shmënë më purquë rdë'na'a adorar lë'ë më según narni'i Espíritu Santo nu rquitë ldu'u hia'a purquë na hia'a shmënë Jesús. Adë rialdídi'i ldu'u hia'a gac salvára'a por ra cusë za'quë naquëgdë'na'a. <sup>4</sup>Parë mënë narni'i nasalvar rall por lo quë nabë'në rall, pues rnia'a, bëna más cusë quë lë'ë rall. Ni tubi chu napë más rsunë quë na parë gúnëll confiar mizmë lë'ëll. <sup>5</sup>Bëriuguë partë shcierpa ziquë runë mënë israelitë iurë bédza'guë llmalë gula. Benjamín guc shtadë guëluhia. Ra shtada na më israelitë nu biadi'dzë rai' dizé hebreo. Guanalda tëchi lëy nanapë mënë israelitë, igual ziquë quëhunë partidë shtë ra fariseo. <sup>6</sup>Por tantë devociuni parë religiuni nanapa, guzunalda ra narialdí ldu'i shti'dzë Jesucristo. Bëna cumplir lëy tubi manërë ecsactë; ni tubi chu gunádi'i catë bëna fallar. <sup>7</sup>Antsë gunia'a grë ra cusë ni lasac, perë iurne' rdë'ëhia cuendë de quë ni tubin lasáquëdi'i parë gac salvara. Sulë Cristo rne'e salvaciuni. <sup>8</sup>Más quë ni ra cusë nabëna antsë, na ziquë gui'lli narru'ldë mënë rua' guë'dchi. Más nasac gunguë bé'ahia lë'ë Cristo Jesús, Shlama. Parë guca shmënë më, bësa'na grë ra cusë shtë guë'dchiliu; na rahin ziquë gui'lli nalasáquëdi'i. Tubsë cusë rac shtua'a, gac më Shlama de verdá. <sup>9</sup>Rac shtua'a gaca unidë con lë'ë më; gaca perdunë, lédëd'i'i purquë bëna cumplir lëy shtë Moisés, sino purquë rialdí ldua'a shti'dzë

Jesucristo. Runë Dios recibir lë'ë hia'a cumë ziquë mënë naná tubldí shcuëndi' lu Dios sulë si talë rialdí ldu'u hia'a shti'dzë më de verdá. <sup>10</sup>Rac shtua'a gunguë bé'ahia lë'ë Cristo nu rac shtua'a gunë më compa'ni na të gapa mizmë pudërë nanapë më iurë guashtë më ladi ra tégulë. Nu rac shtua'a guna sufrir ziquë lë'ë më bë'në më sufrir. Nahia dispuestë gatia ziquë guti më <sup>11</sup>të parë tsashtëa ladi ra tégulë igual ziquë guashtë më ladi ra tégulë.

**Napë quë gáca'a firmë  
hashtë lúltimë dzë**

<sup>12</sup>Adë quëgní'idia'a lu të de quë bëna gan, de quë nahia më za'quë, perë rac shtua'a tsagla'ga delantë parë guna cumplir con grë narac shtu'u më parë na. Ni na narac shtua'a, purquë primërë gudili Cristo Jesús na parë gaca shmënë më. <sup>13</sup>Bëchi, mizmë na rnia'a de quë adë bëna gan grë lo quë narac shtua'a; tubsë cusë runa iurne'; bëa'ldë ldua'a grëtë' lo quë nabëna más antsë nu ziagla'ga parë guna gan másru'u cusë za'quë shtë Dios. Con guëdubi fuersë shtë na, ziquë tubi narllu'në lu carrërë, rac shtua'a grë lo quë nanapë më parë na. <sup>14</sup>Tsagla'ga delantë ziquë tubi narllu'në parë guna gan premi naguëne'e Dios. Parë ni guna'bë Dios na purquë nahia unidë con Jesucristo.

<sup>15</sup>Grë mënë narac bë'a bien shti'dzë Dios, napë quë gunë rall mizmë llgabë ziquë gunia'a ndë'ë. Perë si talë entrë lë'ë të nanú nguui nanapë stubi llgabë, Dios guëluá'ai' lë'ëll lo quë naná verdá.

<sup>16</sup>Sulamëntē cha gáca'a firmē nu guédé'na'a cumplir grē lo quē nariasé hia'a.

<sup>17</sup>Bēchi, gulē gubani ziquē nabania. Gulē guná manērē nabani sa' tē, ra naquēhunē cumplir lo quē nabēlua'a na'a. Gulē cubēnebi manērē nanabani rai'. <sup>18</sup>Gulē bē'nē narnia'a purquē nanú zihani narunē cuntrē Jesús. Nabani rall manērē narlua'a de quē adē rialdídi'i ldu'u rall Jesús guti lu cruz. Hia gunia'a lu tē ndē'ē zihani vultē nu rnia'a lu tē stubi vēsē más hashtë runa rnia'a lu tē. <sup>19</sup>Gabildi na fin shtë ra mēnē ni. Quērēldē rall sulamëntē parē gunē rall cumplir deseo mal shtë rall. Adē rtúdi'i lu rall por mal naquēhunē rall sino más rquitē ldu'u rall. Sulē ra cusē mal shtë guédchiliu zianaldē rall téchi'. <sup>20</sup>Perē rñibē'a Dios lē'ē hia'a dizdē gube'e. De gube'e quēbéza'a Dadē Jesucristo, el quē nangunē salvar lē'ē hia'a tē parē gáca'a ziquē lē'ē mē. <sup>21</sup>Ra cuerpē débíl nadápa'a gunē mē cambi tē parē gaquin ziquē cuerpē nanapē mē gube'e. Gunē mēhin con mizmē pudērē nanapē mē parē guēnibē'a mē grē lo quē nanabani parē guēzu'bē diaguē rall shtë'dzi'.

**Gulē bēagná ldu'u tē lē'ē Dadē Jesús nu gulē bēquitē ldu'u tē**

**4** Por ni rnia'a lu tē bēchi, nalé rac shtua'a lē'ē tē nu napa deseo guēnahia lu tē. Rquitē ldua'a con lē'ē tē; na tē ziquē tubi premi parē na. Dchi'ni nabēna entrē lē'ē tē adē gúquēdi'in de baldē. Iurnē' gulē su firmē lu shnezē Dadē ziquē gunia'a lu tē, lē'ē tē narac shtua'a.

<sup>2</sup>Runa ruēguē lu Evodia nu Síntique, cue tē de acuerdē purquē lē'ē tē napē tē mizmē lamē, Dadē Jesús. <sup>3</sup>Nu rna'ba tubi favurē lul, amigu, bē'nē ruēguē lu ra na'a rē' gac rall de acuerdē purquē antsē bē'nē rall compa'ni na parē guērē'tsē diza'quē shtë Jesús entrē mēnē shtë guédchiliu. Lē'ē rai' con Clemente con los de más nabē'nē compa'ni na, grē lē rai' naescritē la'ni librē shtë registrē nanapē Dios. Gac salvar rai'.

<sup>4</sup>Gulē bēquitē ldu'u tē guédubi tiempē purquē na tē shmēnē Dadē Jesús. Stubi guēnia'a lu tē, gulē bēquitē ldu'u tē. <sup>5</sup>Gulē gac mēnē pacēnci tē parē gac bē'a mieti quēhunē tē tratē bien con sa' tē. Lē'ē Dadē Jesús hia mērē guēabri' lu guédchiliu stubi. <sup>6</sup>Adē riádi'i ldu'u tē lu cusē durē sino bē'nē ruēguē lu Dios tē gunē mē compa'ni lē'ēl. Gulē bēdē'ē graci lu mē; gulē guni'i lu mē grē lo quē narac shtu'u tē. <sup>7</sup>Iurní guēcue'dchí mē ldu'u tē. Llērū'bē na mē parē guēcue'dchí ldu'u ra mēnē; ni tubi chu rac bē'a mudē nanapē mē parē guēcue'dchí mē ldu'u mieti. Mizmē paz ni gapē ldu'u tē con shgabē tē purquē na tē unidē con Cristo Jesús.

**Gulē bē'nē llgabē naná za'quē**

<sup>8</sup>Bēchi, guēnia'a lu tē antsē tsalú cartē rē', gulē bē'nē llgabē lla gac tē mēnē verdá; gulē bē'nē llgabē lo quē narunē tucarē rēspēti. Gulē bē'nē llgabē lo quē naná tubldí nu purē delantē lu Dios; gulē bē'nē llgabē lla gunē tē parē gac shtu'u mieti lē'ē tē nu parē gunē rall honrar lē'ē tē. Gulē bē'nē llgabē lla

gunë të parë gac të më za'quë, nu gulë bë'në llgabë por grë lo quë nalasac lu Dios; gulë tsanaldë ra cusë ni.

<sup>9</sup>Gulë bë'në grë lo quë nabëluá'ahia lu të, grë lo quë nabësë'dë të, grë lo quë nabini të, grë lo quë naganá të bëna. Iurní Dios narcue'dchí ldu'u hia'a cuezénú më lé'él.

**Ra mënë Filipos bédë'ë  
ofrendë parë Pablo**

<sup>10</sup>Nalé rquitë ldua'a purquë nahia unidë con Jesús nu rdë'a graci lu Dadë purquë rac shtu'u të gunë të compa'ni na stubi vësë más aunquë hia zia'a llëduni tiempë dizdë bëshe'ldë të dumí. Adë rní'idia'a de quë bëa'ldë ldu'u të gunë të compa'ni na, perë rnia'a adë nídi'i mudë parë guëshe'ldë të ayudë. <sup>11</sup>Adë rní'idia'a lu të ndë'ë purquë napa nicidá nu rac shtua'a gunë të compa'ni na, purquë bëlu'a më na lla gaca cunformë con lo quë nanapa; riádi'i ldua'a. <sup>12</sup>Tubi tiempë guquërela ziquë ra prubi; niétiquë adë pë nápëdia'a; nu stubi vësë guquërela ziquë ricu. Pues nahia cunformë guëdubi tiempë; rdë'ëhia graci lu Dios si talë napa zihani cusë u si talë adë bë nápëdia'a. Rac rdë'a graci lu më iurë runë faltë nagáuha, igual ziquë iurë napa hashtë subrë. <sup>13</sup>Lë'ë Jesucristo cuezénú na; por fuersë narne'e më runa vencer grë clasë galërzac zi. <sup>14</sup>Perë rnia'a lu të, bë'në të bien iurë bëshe'ldë të ayudë purquë gupa nicidá iurní.

<sup>15</sup>Hia nané të mënë shtë Filipos, iurë guzublú quëadi'dza diza'quë, iurë guquërela Macedonia, sulë lë'ë të bëne'e të ayudë cahia iurní. Stubi grupë narialdí ldu'i diza'quë, bënëdi'i rall compa'ni na aunquë grë rall bë'në rall recibir diza'quë nagunia'a lu rall. <sup>16</sup>Mientras guquërela Tesalónica, lë'ë të bëshe'ldë të ofrendë parë nicidá shtëna. Chupë vueltë bëshe'ldë të ayudë. <sup>17</sup>Adë rzébidi'i ldua'a lë'ë dumí, sino rac shtua'a de quë lë'ë të gunë të recibir premi shtë Dios. <sup>18</sup>Hia bëna recibir más lo quë rqui'nia; con ofrendë nabëshe'ldë të con Epafrodito, napa sufsientë. Nápëdia'a más nicidá. Lo quë nabëshe'ldë të, na ziquë tubi olor nashi, tubi ofrendë parë Dios; bëca'a mëhin nu rquitë ldu'u më. <sup>19</sup>Dios rnibë'a grë cusë. Iurne' guëne'e më ca'a të grë lo quë narunë faltë mientras cuezénúhi' lë'ë të. Guëdchini ra cusë ni purquë unidë na të con Cristo Jesús. <sup>20</sup>Dios Shtëda'a, cha guëdë'na'a alabar lë'ë më iurne' nu catë nídi'i fin. Amén.

**Rshe'ldë Pablo saludë  
parë amigu shtëhi'**

<sup>21</sup>Por partë shtë na, bë'në saludar grë ra grupë shtë shmënë Cristo Jesús ndë. Grë ra shmënë më nananú ndë'ë, rshe'ldë rall saludë parë lë'ë të. <sup>22</sup>Los de más naná rialdí ldu'i diza'quë, rshe'ldë rall saludë, especialmente ra mënë naquëhunë ra dchi'ni lidchi shtë rëy rumanë. <sup>23</sup>Rna'ba lu Dios, gunë ldai' Dadë Jesucristo cadë lë'ë të. Amén.